



XUNTA DE GALICIA

CONSELLERÍA DE
CULTURA E TURISMO
Turismo de Galicia



CONVENIO DE COLABORACIÓN ENTRE A AXENCIA TURISMO DE GALICIA E O CONCELLO DE BEGONTE PARA OBRAS DE ACONDICIONAMENTO DO BELÉN ELECTRÓNICO DE BEGONTE (LUGO).

MEMORIA XUSTIFICATIVA

A xerente de Turismo de Galicia

DECLARA:

Que esta Axencia Turismo de Galicia formalizou co concello de Begonte o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2019.

Que o instrumento convencional ten por obxecto establecer o marco de colaboración entre Axencia Turismo de Galicia e o concello de Begonte para obras de acondicionamento da zona de público do Belén electrónico de Begonte (Lugo).

Que existe converxencia de intereses entre as entidades asinantes en orden á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, segundo o Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, é a entidade pública instrumental da Comunidade Autónoma de Galicia á que lle corresponde o exercicio, entre outras, das competencias en materia de coordinación, impulso, xestión e execución das actividades de promoción do turismo, e para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.





Segundo.- Os concellos, segundo se sinala no artigo 25.2.h) da Lei 7/1985, do 2 de abril, reguladora das bases de réxime local, posto en relación coa Lei 7/2011, do 27 de outubro, do turismo de Galicia, teñen competencias en materia de turismo, en concreto a “información e promoción da actividade turística de interese e ámbito local”.

Terceiro.- Ao abeiro do disposto na Lei 5/1997, do 22 de xullo, de Administración local de Galicia, a Xunta de Galicia e as entidades locais poderán celebrar convenios de colaboración entre si para a máis eficaz xestión e prestación de servizos da súa competencia, podendo coordinar as súas políticas de fomento dirixidas a un mesmo sector, executar puntualmente obras ou servizos e adoptar as medidas oportunas para acadar calquera outra finalidade de contido análogo.

Cuarto.- O Belén electrónico de Begonte móntase no Centro Cultural José Domínguez Guzmán de modo ininterrompido dende o ano 1972. Inaugúrase o primeiro sábado de decembro e pódese visitar ata o último sábado de xaneiro. A súa singularidade ven determinada polo feito de realizar un Belén con pezas artesanais e mecanismos electrónicos para o seu movemento.

Dispón de mais de 150 figuras que se renovan cada ano e son feitas polos veciños que as fan desinteresadamente, as cales están animadas electronicamente e conforman unha escena de belén tradicional, propia de Galicia, onde os labradores traballan a terra, os pastores atenden o ganado, os carpinteiros tallan a madeira e os pescadores pescan no río.

O belén foi crescendo co paso dos anos ata converterse nun clásico do nadal que é visitado cada ano por unhas 40.000 persoas de todas as idades.

Este Belén foi declarado Festa de Interese Turístico de Galicia no ano 2014.

O recinto no que se ubica foi quedando pequeno co paso do tempo e precísase a remodelación do mesmo, sendo o máis urxente o acondicionamento da zona de público, que se trata dun recinto de reducidas dimensións no que a xente entra en pequenos grupos para poder contemplar de preto a animación electrónica.

Así mesmo, dado que a entrada ao recinto realízase en grupos limitados, en ocasións prodúcese aglomeración de xente no exterior, para o cal se dispón dunha zona cunha





cuberta que se encontra en mal estado de conservación, polo que se propón a ampliación deste espazo cuberto e a súa renovación.

No interior, a zona de público dispón dunha bancada de madeira que se sitúa excesivamente preto do escenario do belén, o que limita moitas veces o movemento de persoas con mobilidade reducida, carriños de bebés....etc. Ademais a bancada invade a zona de entrada, o que supón unha barreira arquitectónica no propio acceso ao belén, polo que se pretende a ampliación e remodelación da zona de público, de forma que poida garantirse o acceso a todas as persoas e unha estadía cómoda que garanta o goce do evento, para o cal ampliárase a superficie do recinto de forma que a bancada poida ser retirado cara atrás e substituírase por un novo e de proporcións adecuadas.

Quinto.- O Plan Estratéxico de Turismo de Galicia 2020 sinala como Reto 1, o aproveitamento do potencial dos recursos naturais de Galicia, que permiten construír un destino único e diferencial, artellado ó redor dunha Marca: Galicia. A sustentabilidade do destino será o fío condutor na construción das liñas estratéxicas que se contemplan:

- Paisaxe, recursos naturais e sustentabilidade.
- Valores diferenciadores e o seu potenciamento
- A mobilidade turística
- Os camiños de Santiago como dinamizadores do país

Así mesmo a Liña estratéxica 1: Paisaxe, recursos naturais e sostibilidade, sinala:

O turismo é un gran consumidor de espazos e de recursos naturais. O desenvolvemento da actividade require dunha planificación coherente e ordenada, que garanta a preservación dos espazos especialmente sensibles e a conservación da súa autenticidade e valores patrimoniais, tanto desde o punto de vista natural como desde o punto de vista cultural. A paisaxe como recurso estratéxico, debe de ser preservada e posta en valor desde un punto de vista turístico, garantindo a sostibilidade do espazo natural a medio e longo prazo.

Obxectivos estratéxicos:

1. Impulso ao uso turístico sostible da paisaxe. Ecoturismo





2. Recuperación e mantemento de núcleos singulares
3. Control de capacidade de carga e redistribución de fluxos turísticos
4. Sostibilidade das infraestruturas turísticas

Que a través deste convenio, outórgase ao concello de Begonte unha subvención directa en virtude do disposto no artigo 19.4 c) da Lei 9/2007, do 13 de xuño, de Subvencións de Galicia, polas razóns de interese público, social, económico e humanitario expostas nos puntos anteriores e que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela
A xerente de Turismo de Galicia

M^a Elena Barca Ramos

